

太平寰宇記

第八冊

太平軍年記

卷八

太平寰宇記卷之二十六

關西道二

雍州二

鄠縣

西南六十五里舊二十四鄉今五鄉

本夏有扈國也書序啟與有

扈戰于甘之野卽今縣也有扈鄉復有扈谷亭又

有甘亭是也殷爲崇國文王伐崇卽此秦改爲鄠

漢屬右扶風自漢至隋皆以鄠城置縣卽今縣北

二里故鄠城是也其城周四里頽垣尙在大業十

年移于今所 雞頭山在縣東南三十一里十六

國春秋云僞趙主石生不能守長安欲西上隴士

卒散盡遂入雞頭山爲追兵所害卽此也 牛首

山澇水出焉而注于潏水是多飛魚狀似鮒音甘可

療痔疾山海經云此山有鬼草其葉如葵其秀如

禾服之使人不憂 五牀山郊祀志謂鄠有五牀

卽此也 豐水源出終南山書謂豐水攸同卽同

于渭也 潏谷水源出終南潏谷經縣理西北經

黃音附陽宮注于渭 檀谷水長安渠水之上流也

源亦出終南檀谷中 太平谷水一名林谷水卽

清渠水之上流也源亦出終南山 扈陽谷一名

扈水今名馬腹陂水經注云扈水上承扈陽池

萇陽宮漢地理志鄠縣有萇陽宮秦文所起宣帝
甘露二年冬幸之 龍臺澤一云觀水也在豐水
西北近渭上林賦云登龍臺是也 宜春宮漢武
帝所築今爲苑名 甘亭在縣西五里夏啟伐有
扈誓師于甘之野卽此處也續漢書云鄠縣有甘
亭水經注云亭在甘水之東 八部澤在縣東南
五里周迴五十里 故鄠城在縣北二里夏之扈
國也 鍾官故城一名灌鍾城在縣東北二十五
里蓋始皇收天下兵器銷爲鍾鐻此或其處 馬
祖壇在縣東北三十二里龍臺澤中每年太僕太

常四時祭焉春祭馬祖夏祭先牧秋祭馬社冬祭馬步 隋太平宮在縣東南三十一里對太平谷 因名 隋甘泉宮在縣西南二十二里對甘泉谷 因名 周豐宮周文王宮也在縣東三十五里詩云既伐于崇作邑于豐是也崇侯無道文王伐之 命無殺人無壞宮室崇人聞之如歸父母遂虜崇侯豐邑崇國在秦晉之間

藍田縣

東北八十里舊二鄉今四鄉

本秦之舊縣也竹書紀年

云惠王命秦子向爲藍田君是此漢地理志曰藍田本秦孝公置山出美玉周禮注曰玉之美者曰

球其次曰藍蓋以縣出美玉故名藍田周閔帝割
京兆之藍田又置玉山白鹿等三縣置藍田郡至
武帝省郡復爲藍田縣屬京兆後遂因之今縣理
卽嶢柳城也俗亦謂之青泥城桓溫伐苻健使將
軍薛珍擊青泥城破之卽其處也 藍田山古華
胥氏陵在縣西三十里一名玉山一名覆車山郭
緣生述征記云山形如覆車之象也按後魏風土
記云山巔方二里仙聖遊集之所劉雄鳴學道于
此下有祠甚嚴亦灞水之源出于此又西有尊盧
氏陵次北有女媧氏谷則知此地是三皇舊居于

此 蕢山在縣東南二十五里漢書謂沛公入嶢
關踰蕢山卽謂此也 倒虎山一名玄象山在覆
車山北苻堅時王子年始隱于東陽谷後避石季
龍之亂徙于此 白鹿原在縣西北六里按三秦
記云周平王東遷之後有白鹿遊此原以是得名
則秦運之象也晉桓溫伐苻健都護鄧遐等奮擊
于白鹿原卽此地也 風涼原按水經云研盤谷
若谷二水合于東流經風涼原卽謂此原也 藍
田關卽秦之嶢關也在縣東南九十八里史記秦
將趙高將兵拒嶢關沛公引兵攻嶢關踰蕢山擊

秦軍大敗之周明帝武成元年自嶢關移置青泥
故城側改曰青泥關武帝建德三年改爲藍田關
思鄉城在縣東南三十二里宋武帝征關中築
城于此南人思鄉因以爲名 灞水源出藍田谷
古謂之滋水秦穆公改焉以霸盛徵名卽秦嶺水
之下流東南自商州上洛縣界流入又西北流合
滻水入渭 金谷水東北流至滻水源出終南山
之金谷

咸陽縣

北四十里舊二十鄉今五鄉

本周王季舊都也秦孝公十

二年于渭北作咸陽徙都之按三秦記云咸陽秦

所都在九嵎山南渭水北山水俱陽故名咸陽胡

亥時閭樂爲咸陽令漢高元年更名新城七年罷

屬長安元鼎三年置渭城縣屬右扶風

按秦咸陽在今縣東

十五里咸陽故城是也漢地理志渭城縣故咸陽地苻堅時于今縣東北長

陵城置咸陽郡後魏太和二十年移咸陽郡于涇

水北今涇陽縣也隋開皇十一年移咸陽于故咸

陽城西北三里卽今縣城也按今縣卽秦之杜郵

也大業二年省唐武德二年權寄理鮑橋三年移

就白起堡六年又移于便橋西北百步官路北卽

今縣天授二年四月武后以其母順陵在其界升

爲赤縣神龍元年十月卻爲畿縣 畢原左傳王
使詹桓伯辭于晉曰我自夏以后稷魏駘芮岐畢
吾西土也又曰畢原酆郇文之昭也蓋武王克商
之後以其地封文王子也杜注畢國在長安西北
關中記高陵北有畢原原南北數十里東西二三
百里無山川陂湖井深五十丈亦謂之畢陌秦謂
池陽原漢名長平坂漢氏諸陵並在其上下又名
石安原卽石勒置石安縣之所 渭水南去縣三
十里西南自始平界流入東與豐水會于矩山舊
有便門橋卽此處 咸陽故城秦自孝公惠文王

悼武王昭襄王莊襄王孝文王始皇帝胡亥並都咸陽卽此城也漢以爲渭城縣史記秦本紀孝公十二年作咸陽築冀闕徙都之始皇本紀二十六年秦初併天下收天下兵器聚之咸陽鑄以爲鍾鐻金人十二重各千石置庭中徙天下豪富于咸陽十二萬戶諸廟及章臺上林皆在渭南秦每破諸侯寫倣其宮室作之咸陽北坂上南臨渭自雍門以東至涇渭殿屋複道周閣相屬所得諸侯美人鍾鼓以充之漢書鄒陽上書云秦倚曲臺之宮應劭注云始皇所理處若漢之未央也三輔黃圖

云秦始皇兼天下都咸陽因北陵營殿端門四達以則紫宮象帝居渭水貫都以象天漢橫橋南渡以法牽牛廟記云北至九變甘泉南至長楊五柞東至河西至汧渭之交東西八百里南北四百里離宮別觀相屬也木衣綈繡土被朱紫宮人不移樂不改懸窮年忘歸猶不能遍三輔舊事云始皇表河以爲秦東門表汧以爲秦西門中外殿觀百四十五後宮列女萬餘人婦人之氣上衝于天至胡亥時天下苦秦漢元年秦王子嬰降項羽引兵西屠咸陽殺子嬰燒秦宮室火三月不滅及漢興

以爲渭城縣屬右扶風按秦咸陽在今縣東二十里漢渭城縣亦理于此長陵故城在今縣東北四十里初漢徙關東豪族以奉陵邑長陵茂陵各萬戶其餘五陵各五百戶皆屬太常不隸于郡去高帝長陵三里晉省今廢城存故杜牧詩曰小市長陵住卽此也故渭城在今縣東北二十二里渭水北卽秦之杜郵白起死于此其城周八里秦自孝公至始皇皆都于此城武帝元鼎三年更名渭城後漢省併地入長安故此城存安陵故邑周之程邑漢爲縣惠帝置周書曰惟王季宅于程

孟子曰文王卒于畢郢卽此地也帝王代紀王季徙宅于程陽陵城故弋陽地景帝改爲陽陵縣屬左馮翊廢城在縣東北四十一里東至景帝陵二里曹魏省之張敖冢在安陵東三十里冢上有五嶽之象今人謂之五角冢平陵城漢平陵縣屬右扶風在今縣西北八十里故城是也昭帝陵在故縣城北二里魏黃初中改爲始平縣苻秦移縣于茂陵故城因而荒廢按郡國記云平陵故城與茂陵故城相去二里細柳倉在縣西南三十里漢舊倉名文帝六年周亞夫屯軍之所也張

揖云在昆明池南恐爲疏遠 棘門在縣東北一十八里本秦闕門也漢文帝使將軍徐厲屯兵于棘門謂此也 周氏陂周迴一十三里漢太尉周勃家在陂其子亞夫有功遂賜此陂故地以氏稱之 杜郵亭在縣西南三十八里白起自刎之處 秦蘭池宮在縣東二十五里 秦磁石門在縣東南一十五里東西有閣道卽阿房之北門也累磁石以爲之著鐵甲入者磁石吸之不得過羌胡以爲神 蘭池陂卽秦之蘭池也在縣東二十五里初始皇引渭水爲長池東西二百里南北二十

里築爲蓬萊山刻石爲鯨魚長二百丈始皇嘗微
行遇盜于蘭池見窘武士擊殺盜關中大索中
渭橋在縣東南二十里本名橫橋架渭水上始皇
都咸陽渭水貫都以象天漢橫橋南渡以象牽牛
渭水南有長樂宮渭水北有咸陽宮欲通二宮之
閒故造此橋漢末董卓燒之魏文帝更造劉裕入
關又毀之後魏重造貞觀十年移于今所便橋
在縣西南一十里架渭水上武帝建元三年初作
便門橋在長安北茂陵東去長安四十里長安城
西門曰便門此橋與門對因號便橋白起祠在